



LE GOUVERNEMENT
DU GRAND-DUCHÉ DE LUXEMBOURG
Ministère des Finances

CHAMBRE DES DÉPUTÉS

Entrée le:

03 DEC. 2019

Monsieur le Ministre
aux Relations avec le Parlement
p.a. Service Central de Législation
5, rue Plaetis
L-2338 LUXEMBOURG

Référence : 82fx39e98

Luxembourg, le 3 décembre 2019

Concerne : Question parlementaire n° 1401 du 28 octobre 2019 de Monsieur le Député Marc Goergen concernant les réparations de produits

Monsieur le Ministre,

J'ai l'honneur de vous transmettre ci-joint la réponse commune à la question parlementaire sous rubrique.

Veuillez agréer, Monsieur le Ministre, l'expression de mes sentiments très distingués.

Le Ministre des Finances,

Pierre GRAMEGNA

Gemeinsam Äntwert vun dem Finanzminister, vun der Ministesch fir Umwelt, Klima an nohalteg Entwécklung, der Ministesch fir Konsumenteschutz, an dem Minister fir Energie op d'parlamentarësch Fro n°1401 vum 28. Oktober 2019 vum honorabelen Deputéierten Här Marc Goergen

1) Dir Dammen an Häre Minister, wéini ginn déi Mesuren, déi Dir am Koalitiounsaccord ugekënnegt hutt ëmgesat?

Den honorabelen Deputéierten beriff sech op de Koalitiounsaccord an deem d'Regierung sech d'Missioun gëtt e super reduzéierten TVA Taux vun 3% op Reparaturaarbechten anzeféieren. Am Regierungsprogramm gëtt och de Stellwäert deen der Économie circulaire bäigemoss gëtt ennerstrach.

Deen ugeschwate Steiersaz ass en Deel vun enger méi allgemenger Approche, genau esou wéi de Prinzip vum "Prosumer" wou de Konsument gläichzäiteg och Produzent ass. D'Économie circulaire ass also ee multidisziplinären Exercice, dee ministèreiwwergräifend ass an desweideren en Effort vun jidderengem, also der gesamter Gesellschaft erfuedert.

D'geplangte Steuerreform wäert d'Geleeënheet bidde fir déi steuerlech Aspekter dovunner ze beliichten. An engem anere Kader wäerten déi aner vum honorabelen Deputéierten ugeschwate Froen diskutéiert ginn. Dat Ganzt muss een als e kontinuierleche Prozess gesi wou sech een Element zu deem aneren bäifügt.

D'Directive (UE) 2019/771 du 20 mai 2019 relative à certains aspects concernant les contrats de vente de biens gesäit vir, datt d'Dauer vun der Konformitéitsgarantie weider zwee Joer bedréit. Desweideren trëtt d'Beweislaascht vum Konsument net méi no sechs Méint an, mee réischt no engem Joer. Dëst bedeit, dat de Konsument am Laf vum éischte Joer net muss noweisen datt de Konformitéitsfeeler scho beim Kaf bestanen huet an also net vun him verursaacht ginn ass. Dës Directive muss bis den 1. Juli 2021 ëmgesat ginn an trëtt den 1. Januar 2022 a Kraaft.

2) Wéi stinn di Dammen an Häre Minister zu folgenden Mesuren?

- 1. Legiferéieren géint d'geplangten Obsoleszenz?**
- 2. Verlängerung vun der legaler Garantie op Produiten?**
- 3. Enger Baisse vun der TVA op Reparatiounen?**
- 4. D'Promouvéieren vu Reparatiounen duerch steuerlech Erliichterungen?**

Fir d'Reparatioun dauerhaft ze féerden, kënnen theoretesch verschidde Mesuren ergraff ginn. Eng Benelux-Studie vu Juni 2018, un der den Ëmweltministère sech och bedeelegt huet, ënnersicht déi Krittären, déi wichteg si fir datt Géigestänn a Geräter méi reparatiounsfäeg solle sinn, an och tatsächlech kënnen gefléckt ginn. Si kuckt d'Avantagen, mee och d'Nodeeler vun deene Krittären. Op dës Punkte muss opgepasst ginn, iert national Mesurë getraff ginn. Zum Beispill weist déi Studie drop hin, datt d'Verlängerung vun enger legaler Garantie en Afloss kann hunn op de Präis vum Géigestand. Déi geplangten Obsoleszenz ass wëssenschaftlech nach net genuch dokumentéiert; d'Europäesch Kommissioun huet e Projet am Kader vun Horizon 2020 iwwert dat Thema gestart: "PRemature Obsolescence Multi-Stakeholder Product Testing Program". Dëse Projet huet am Mee 2019 ugefaangen, a leeft bis Enn Abrëll 2023. Am Kader vun der Ausschaffung vu Promotiounsmesurë fir d'Reparatioun, wäert de Ministère d'Resultater vun deenen Aarbechte verfolgegen.

Et soll och ernimmt ginn, datt haut schon am Règlement grand-ducal iwwert den Elektroschrott vum 30. Juli 2013 eng Informatiounsverpflichtung fir d'Hiersteller dra steet. Si mussen technesch Informatiounen fir d'Reparatioun an d'Weiderbenutzung vun hirem Apparat uginn an zur Verfügung stellen.

3) Ass d'Regierung sech der „First Mover Positioun“ vun aneren europäesche Länner op dësem Gebitt bewosst? Wa jo, firwat leeft Lëtzebuerg an dëser Fro dem noen Ausland weiderhin hannendrun, wëssend datt mir um Gebitt vun der Nohaltegkeet séier mussen agéieren?

Mir sinn eis bewosst, datt Frankräich eng spezifesch Legislatioun iwwert geplangten Obsoleszenz huet. Och aner Länner ginn op Basis vun der Legislatioun iwwert onlauter Geschäftspraktike géint déi Praktike vir. Et muss ee sech trotzdem och bewosst sinn, datt déi quasi Totalitéit vun de Produiten déi zu Lëtzebuerg verkaf ginn - an dat gëlt ganz besonnesch fir déi elektresch Apparater - importéiert ginn. Dofir mécht et Sënn, datt wat d'Legiferéieren am Kontext vun der geplangtener Obsoleszenz ugeet, dëst an engem europäesche Kontext geschitt.

Onofhängeg dovun lafen zu Lëtzebuerg um prakteschen Niveau am Moment schonn eng ganz Rei vun interessante Projeten, déi zur Promotioun vun der Reparatioun a vun der Liewensverlängerung vu Géigestänn bäidroen. Dës Projeten interesséieren och aner europäesch Länner, well et dat net ëmmer esou bei hinne gëtt :

- D'*Service Center* déi aktuell vun der Ecotrel an dräi Recyclingsparke getest ginn. Zil vun dëse Service Centeren ass et, datt d'Leit elektresch Apparater zeréckbréngen kënnen, déi eventuell nach kënnen benotzt ginn. Si ginn op enger bestëmmter Plaz ugeholl, ginn dann do ënnersicht fir eraus ze fannen op se erëm kënnen benotzt ginn an ob se eventuell musse virdrun nach gefléckt oder gebotzt ginn. Wa se nees gebrauchsfäeg sinn, gi se iwwert sozial Gesellschaften nees verkaf. No éischten Erfarunge stellt sech eraus, datt ronn 70% vun den Apparater déi esou ofgi ginn, nees kënnen weider benotzt ginn.
- De nationalen Internetsité www.flecken-a-leinen.lu, ass eng Plattform wou Betriber ugewise ginn, déi entweder Saache flécken oder se ausléinen. Aktuell sinn eng knapp 100 Betriber iwwert d'Land verdeelt op dësem Site präsent.
- D'Aktioun *Clever Akafen* vun der SuperDrecksKëscht, déi mat Kategorie wéi "opluedbar Batterien an Accessoires" a "laangliweg an energiespuerend Beliichtung" d'Leit an hirem Alldag dozou motivéiert, méi nohalteg an dauerhaft Géigestänn ze kafen.

Donieft sief och dorop higewisen, datt vill lëtzebuergesch Gemengen regelméisseg Repair-Café fir hir Awunner organiséieren.